

清苑縣志

甲戌四月榕署



民國甲戌

清苑縣志

周維章題



金石<sup>上</sup>

攷吳摯甫先生深州風土記其敘金石云典籍散亡證之碑刻又云佚在貞珉或補方聞賈氏志鹽山其金石篇自敘云金石家斷自元元以前雖俚俗之事不遺明以來雖鴻文巨典概從闕如嘻其僂矣今俚者存其目文雖俚而事足存者載其略文辭淹雅及事關掌故者甯過而存觀兩先生之言則方志之列金石義主徵文考獻與耑以金石著錄者厥旨微異矧集古錄序有言撮其大要別爲目錄并載可與史傳正其闕謬者以傳後學顧亭林撰金石文字記其自序亦云其事多與史書相證明可以闡幽表微補闕正誤是錄金石而不遺其文由來舊矣倘遺其文所謂正其闕誤闡幽表微

者將何賴焉今本吳賈兩先生之旨於其文殘闕不可卒讀  
或採訪未具者姑列其目其有關文獻而辭或繁縟者則節  
錄大略若文辭淹雅又足資攷證者則備載焉庶幾與方志  
列金石之旨不違亦足資嗜古者之瀏覽也志金石

唐

易州刺史田琬德政碑

行書徐安撰蘇靈芝書在蓮池中集古目錄云琬字正勤自易  
州刺史遷安西都護此易州人所立德政碑也以開元二十八  
年十月立鄭樵金石略云易州刺史田仁琬德政碑蘇靈芝書  
在易州石墨鏤華云靈芝武功人生開元天寶間與胡霈然齊  
名今霈然書不可見見此碑可以得其概矣潛研堂金石文跋

尾云碑在保定府蓮池書院碑云公名琬字正勤而趙氏金石錄鄭氏金石略于氏天下金石志並題作田仁琬德政碑今易州龍興觀石刻道德經末亦題刺史田仁琬名元和郡縣志又書易州刺史田琬碑刻立於當時稱名必無差誤不知何以異同若此也金石萃編云此碑徐安貞撰文題大中大夫守中書侍郎集賢院學士上柱國東海縣開國男舊唐書傳安貞信安龍邱人開元中爲中書舍人集賢院學士上每屬文作手詔多命安貞視草累遷中書侍郎新書傳云徐楚璧終中書侍郎東海縣子在中書省久是時李林甫用事或言計議多所參後更名安貞今碑作東海縣男與新書異餘官與兩史同碑已題安貞則傳云後改名安貞者當在二十八年以前矣平津讀碑記



云在保定府蓮池書院易州御註道德經後諸臣銜名稱仁琬  
此碑稱公名琬字正勤疑是其後改名京畿金石攷云此碑在  
清苑縣畿輔通志云在保定府學明倫堂左隅錢大昕洪頤煊  
皆云在蓮池書院不知何時移置至通志略載在易州蓋因田  
琬爲易州刺史故云案府學明倫堂舊址於民國十八年經官  
產局處分展轉易主此碑遂棄置於南白衣庵前碎爲十二斷  
字跡雖久經殘毀尙多完好者現經文獻委員會命贖歸復安置  
蓮池中

宋

龍泉寺陀羅尼幢

在蓮池六幢亭內東北隅畿輔通志云此幢歷來著錄家未收

舊在縣治東十五里孫村光緒七年編修黃彭年因修通志採訪得之於蔓蕪中恐其遂致湮毀輦至縣城蓮花池皮諸六幢亭石久經剝蝕漫漶不可辨其末行有二年歲次辛酉十月辛卯朔等字尙明顯其二年上髣髴爲隆字之半案錢大昕四史朔閏考宋太祖建隆二年歲次辛酉十月辛卯朔與此幢記年書朔干支恰符當爲宋初所造無疑

重修東嶽廟記

案此碑今已無存京畿金石考云在府治東北王著書畿輔通志謂在縣城內東嶽廟門內右隅政和三年立行書篆額王著撰并書楊希仲書額考淳化閣帖爲王著所模淳化下距政和百數十年非一人也

石佛像

案此像今亦無存畿輔通志云東嶽廟碑陰上截有造像一區土人就其像築龕以祠之下截砌以磚石不可摹拓不知何代所造以與前碑同列一石故附其後

遼

田氏造尊勝陀羅尼幢

田氏造陀羅尼幢記

在蓮池六幢亭內東南隅其上截爲般若波羅密多心經幢黃彭年六幢亭記云其一二方正書記人曰中社田氏記地曰遼易州易縣固城記時則壽昌元年六方遼國書府志云佛頂尊勝陀羅尼幢記壽昌元年冬十月二十二日正書在定興縣今



移府城古蓮花池畿輔通志曰幢舊在定興縣固城東南寶峯寺光緒七年輦至清苑縣蓮池六幢亭內

造石佛像幢

般若波羅密多心經幢

在蓮池六幢亭內東南隅田氏造陀羅尼幢上截六幢亭記云其一一方造像一方遼國書六方皆正書畿輔通志云此幢與前幢同在定興今亦輦至六幢亭

金

譙樓鐘鑄像

譙樓鐘欵

在今縣學街干雲樓上府志云在鼓樓街干雲樓上高丈餘周

三丈餘厚尺餘中帶三層每層每方皆鑄佛像上層八面八大  
字皇帝萬歲重臣千秋篆書中層一方正書七行第一行武略  
將軍觀察南宮大達第二行定遠大將軍同知完顏豪第三行  
鎮國將軍順天軍節度使第四行駙馬都尉唐括貢第五行吳  
國公下泐第六行大定二十一年歲次辛丑辰月第七行丙子  
日戊子時鐘成

田殖造陀羅尼經幢

案此幢原在六幢亭內東北隅龍泉寺陀羅尼幢上層今已墮  
地中斷處有木軸銜接棄置亭內現經文獻委員會修復仍置  
原處六幢亭記云幢斷爲二合而觀之記人曰田殖記地曰樓  
桑村記時則金大定二年凡八方二方正書二方金國書畿輔



通志云舊在涿州桓侯祠旁藥王庵光緒七年輦至六幢亭

元

### 宣化堂記

案此碑今已無存明一統志云在大甯都司治今後堂即其遺址至元中治中周孟戡建爲一道承流宣化之所劉因爲記

清苑尹耶律公遺愛碑

舊志

劉因

至元九年五月以工部主事耶律公伯堅爲清苑尹後四年八月用臺薦擢同知恩州事公字壽之桓州人氣豪爽有幽燕俠士風其接人雖一無所失而中有裁鑑樂與當世名士遊雖貧乏至典衣延致不少懈有御錯縱才昔或薦公規措關陝川蜀財賦詔可之公至爲條件利病疏畫出納事治而物安識者稱

其能性明決憲司及府有滯獄必檄公平之公能不以刑得其情而訟者亦以公所理無冤爲政不事表襮而民知愛不任刑罰而民知畏作事必爲遠計使人得以守其成法而不卽壞亂其處已御下則欲與者避其廉受罰者思其公其爲清苑也安肅苦徐水之害訴于大農欲以人力奪水之故道道而東之東則縣之境也其地形有不能遂其迅激之性者而水必終返其故道而其沮洳波蕩壞民田幾千頃彼之害旣不得而除而重其以害貽我畚鍤已興民睨視之莫知計所出公爲圖地形指陳利害要農官及郡侯與俱行視以止之縣之西塘水利溉民田甚廣有力者以塏奪之而民無訴所公至爲斷理以每歲溉田之餘月分之塏仍聞省部著爲定制縣居南北衝每歲爲親



王大官治供帳于縣西以十月成明年復撤而新之吏得媒孽其事而至歲費不貲公以一廢館舍移其所不足分俸祿以繼之館成而是役絕縣西南衛村多古斥堠溝塹時伏盜其間公爲墮其高湮其下而奪其穴焉盜於是息縣舊雜民居而縣之鹽法息錢例當已有公曰是錢在我不必有公廨在縣不可無遂割之以起廨凡連年和買之不降其直者公至白之執政盡降之凡府之賦縣有不均者公輒曰寧得辜於上不敢得辜於下必爲爭辦得其平而後已移恩之明年恩人已刻石頌公又明年清苑之耆老故吏亦思公不忘以予與公有一日之雅介吾友趙安之請予紀公遺愛予亦樂以循吏爲天下勸而又喜邑人能被公之化而不忘其舊官長之賢故次第其民之所以

謠公者而爲之詩庶其傳之採官以存一邑之風且爲他日太史氏之傳循吏者以張本焉嗚呼使邑人歌之野足以爲農勸歌之邑足以爲吏勸歌之道路聞之恩人又足以致奪公之私怨公早歷臺閣人望其通顯可立致旣而獨從外補今又老且病將不能復與功名會此在人不能無少難者而公處之裕如使恩聞而歌之以壽公則其沉滯之私雖不待有所慰而後忘而其及人之樂則或因此而長之也其辭曰

我行東野有田離離燥焉膏腴彼鄰不知持以嚙水孰恤我饑惟耶律公出言若堤奪田以水障水以歸西塘之陂無水旱虞非陂得歲食我惟渠水匪附勢奚捨我趨望公之來使我心休公浸以理渠來舒舒公實水來公實水去田雖我田實公錫與



我之德公非惟水故有勢非水微公孰禦縣官渠渠公力所支  
昔有絲棼今皆晝旗聞公車者更戒勿嬉旂來揚揚有宮以息  
彼安其宮我安斯室車不知服子不知力彼盜之穴南據邱隅  
公行視之荷鍤與俱昔路斯棘化而通途奪田與我奪時與我  
以耕以食予以飽我食惟公食持以勞公公曰歸止飽爾羸癯  
公堂燕深孰公不容天乃私恩奪公之東惟彼東人相戒以化  
無勞我公我思我公神其相之惟壽康公俾公其來之

造石佛像

造舍利眞言幢

造石佛像

造莊嚴寶王眞言幢

均在蓮池六幢亭內府志云莊嚴寶王眞言經幢舍利眞言經幢二俱本國書無年月在定興縣固城鎮今移古蓮花池六幢亭記云三幢幢各八方一方造像七方皆元國書畿輔通志云幢舊在定興縣固城鎮龍泉臺光緒七年輦至清苑縣置蓮花池六幢亭內

明威將軍後衛親軍總管李公先塋碑銘

舊志

至元十七年丞相伯顏以舊所領諸將中四人見皇太子曰此皆臣攻江南時渡江水戰攻城略地爲國家盡力命臣所親見者是時天下事聽皇太子處置乃命四人者無外補可使將侍衛親軍仍賜食殿中今致仕後衛總管清苑李公其一也公便騎射材趨過人雖自幼以宦家子從軍爲將校然每喜與士大

夫遊且其居近予故聞其勲爵行事也習壬戌憲宗南征將兵隸史忠武公至巴州能却敵攻諸柵先登至崇慶卒遇敵江峽奪戰艦中統元年今上北征復將兵隸忠武至吉河三年李壇叛將兵隸張勇烈公圍濟南日夜與賊戰獲賊衆十餘人明年詔河南統軍略地荆南將勇敢分攻堅柵多所克拔九年圍襄陽十一年丞相代宋爲衙前將至鄂州部所將引戰艦入至郢州夜奪浮橋攻沙陽新城二柵先登渡江將勇敢水軍首與敵遇取旗戰艦甲仗旣渡能盡却所當守岸兵復入江順流追奪至白虎山明年取眞州能退敵焚其舟時敵將夏貴水軍陣巢湖勢不可犯能破其堅奪旗鼓戰艦取常州將勇敢先登拔其城又略定蘇秀二州此其功憲宗時中書右丞相公子清牒爲